

**Ed. 463. Frumvarp til laga [217. mál]**

um norrænan tækni- og iðnþróunarsjóð.

(Lagt fyrir Alþingi á 93. löggjafarþingi, 1972—1973.)

**1. gr.**

Ríkisstjórninni er heimilt að staðfesta fyrir Íslands hönd, samning ríkisstjórnar Danmerkur, Finnlands, Íslands, Noregs og Svíþjóðar um stofnun norræns tækni- og iðnþróunarsjóðs, sem gerður var í Osló 20. febrúar 1973. Texti samningsins fylgir lögum þessum og telst hluti af þeim og skulu ákvæði hans hafa lagagildi hér á landi.

**2. gr.**

Sjóðurinn er undanþeginn opinberum gjöldum og sköttum hér á landi.  
Sjóðurinn er undanþeginn stimpilgjöldum af lánnum og öðrum fjárskuldbindingum, er hann kann að taka á sig hér á landi.

**3. gr.**

Lög þessi öðlast þegar gildi.

**Athugasemdir við lagafrumvarp þetta.**

Á fundi Norðurlandaráðs í Osló hinn 20. febrúar 1973 var gerður samnorrænn samningur um norrænan tækni- og iðnþróunarsjóð. Eins og fram kemur í 1. gr. samnings þessa er markmið hans að styrkja og auka nýtingu á norrænum auðlindum á sviði tækni og iðnþróunar. Stofnfé var ákveðið 10 milljónir sænskra króna.

Norrænu ráðherranefndinni var falið að semja stofnskrá sjóðsins svo og almenna stefnuskrá og verkefnaröðun.

Á fundi iðnaðarráðherra Norðurlanda í Osló 21. febrúar 1973, voru eftirtaldir aðalmenn skipaðir í bráðabirgðastjórn sjóðsins:

Frá Danmörku: Konsulent Ágo Andersen, Handelsministeriet.

Frá Finnlandi: Överdirektör Pekka Jauho, Statens tekniska forskningsinstitut.

Frá Íslandi: Árni Snævarr, ráðuneytisstjóri, iðnaðarráðuneytinu.

Frá Svíþjóð: Kansliráðet Sigfrid Wennerberg, Industridepartementet.

Frá Noregi: Underdirektør Christofer Owe, Industridepartementet.

Frá Nordforsk: Direktør Th. Franck, DTVF.

Þess má vænta, að sjóður þessi geti orðið Íslandi til hjálpar á sviði tækni og iðnaðar.

Einstakar greinar þarfnast ekki skýringa.

**Fylgiskjal I.**

**SAMNINGUR**

**milli Danmerkur, Finnlands, Íslands, Noregs og Svíþjóðar um norrænan tækni- og iðnþróunarsjóð.**

Ríkisstjórnir Danmerkur, Finnlands, Íslands, Noregs og Svíþjóðar hafa ákveðið að stofna norrænan tækni- og iðnþróunarsjóð, sem þátt í þróun samstarfs á sviði iðnaðar og hafa gert með sér svofelldan samning:

## **Markmið.**

### **1. grein.**

Markmið sjóðsins er að styrkja og auka nýtingu á norrænum auðlindum á sviði tækni og iðnþróunar með því, að efla og auka samstarf samningsaðilanna, svo og með því að styðja fjárhagslega framkvæmdir, sem hafa þýðingu fyrir tvö eða fleiri Norðurlandanna, og alþjóðlegar framkvæmdir, sem hafa þýðingu fyrir Norðurlönd í heild.

## **Fjármagn.**

### **2. grein.**

Fjármagn sjóðsins, sem upphaflega er 10 milljónir sænskra króna, er framlag að upphæð 2.2 milljónir sænskra króna frá Danmörku, 1.6 milljónir sænskra króna frá Finnlandi, 0.1 milljón sænskra króna frá Íslandi, 1.6 milljónir sænskra króna frá Noregi og 4.5 milljónir sænskra króna frá Svíþjóð.

Norræna ráðherranefndin kveður á eftir þörf um áframhaldandi fjárframlög til sjóðsins og um rétt sjóðsins til þess að veita fjárhagsábyrgðir umfram fyrirbyggjandi fjármagn og veita margra ára stuðning jafnframt því, sem nefndin skiptir framlögum til sjóðsins milli samningsaðila.

## **Starfsvið.**

### **3. grein.**

Ráðherranefndin ákveður almenna stefnuskrá og verkefnaöðun í starfsemi sjóðsins.

Ráðherranefndin ákveður stofnskrá sjóðsins.

### **4. grein.**

Endurskoðandi þess ríkis, þar sem sjóðurinn er staðsettur, hefur eftirlit með fjármálum sjóðsins.

Ráðherranefndin gefur Norðurlandaráði árlega skýrslu um starfsemi sjóðsins.

## **Lokaákvæði.**

### **5. grein.**

Samning þennan skal fullgilda og skulu fullgildingarskjölin, svo skjótt sem við verður komið, afhent norska utanríkisráðuneytinu.

Samningur þessi skal varðveittur í norska utanríkisráðuneytinu, sem sendir hverjum samningsaðila staðfest afrit.

Samningurinn tekur gildi þann dag er ráðherranefndin ákveður.

### **6. grein.**

Æski einhver samningsaðila að segja samningnum upp, skal skrifleg tilkynning um það send ríkisstjórn Noregs, er tafarlaust skal skýra hinum samningsaðilunum frá því, svo og hvenær tilkynningin hafi borizt.

Samningurinn fellur úr gildi við lok þess almanaksárs, er einhver samningsaðila segir honum upp, svo framarlega að uppsagnartilkynningin hafi borizt norsku ríkisstjórninni eigi síðar en 30. júní það ár, en ella við lok næsta almanaksárs.

### **7. grein.**

Eftir viðtöku uppsagnartilkynningar skulu allir samningsaðilar hafa samráð sín á milli um niðurfellingu þeirra réttinda og skyldna, sem samningsaðilum voru fengin samkvæmt samningnum.

Þessu til staðfestingar hafa undirritaðir fulltrúar, sem til þess höfðu umboð, undirritað samning þennan.

Gjört í Osló, hinn 20. febrúar 1973, í einu eintaki á dönsku, finnsku, íslenzku, norsku og sænsku, og skulu þeir textar allir jafngildir.

Fyrir ríkisstjórn Danmerkur  
Ivar Nørgaard.

Fyrir ríkisstjórn Íslands  
Ólafur Jóhannesson.

Fyrir ríkisstjórn Finnlands  
Pekka Tarjanne.

Fyrir ríkisstjórn Noregs  
Hallvard Eika.

Fyrir ríkisstjórn Svíþjóðar  
Kjell-Olof Feldt.